




DIE KEKKELBEK



**SAWA - STREEK VAALRIVIER
FEBRUARIE 2020 UITGAWE**





VOORSITTER

Francois Pretorius E-pos: Francois.Pretorius@mtn.co.za
Sel No: 083-2126205



ONDER-VOORSITTER

Leon Delport E-pos: leondelport@live.com
Sel No: 082-7545346



SEKRETARESSE

Joey Delport E-pos: Sekretaresse.vaalrivier@hotmail.co.za
Sel No: 082-5619606



PENNINGMEESTERES

Elize van der Schyff E-pos: sawa.vaalpenning@gmail.com
Sel No: 072-2059681



REDAKSIONEEL

Louise van Zyl E-pos: kekkelbek.vaalrivier@gmail.com
Sel No: 083-4475784



- ❖ **INLEIDINGSFOTO'S VAN ONS NAWEEK BY SIONBERGH**
- ❖ **DIE VOORSITTER SE UITKYK**
- ❖ **DIE ONDER-VOORSITTER SE UITKYK**
- ❖ **FINANSIËLE VERSLAG**
- ❖ **REDAKSIE**
- ❖ **KAMPKASKENADES**
- ❖ **RESEP: JAPTRAP ETE**
- ❖ **VERJAARDAE/HUWELIKSHERDENKINGS/GELUKWENSE**
- ❖ **BETERSKAPWENSE/PELGRIMSGEBED**
- ❖ **DIE SENIORS SE HOEKIE**
- ❖ **DIE VISSERMANNE IS BESIG BY SIONBERGH**
- ❖ **SKINDERBEKKIE SE VERHAAL VAN NAASTELIEFDE**
- ❖ **VIR DIE JONGSPAN**
- ❖ **VIR DIE BIETJIE OUER SPAN**
- ❖ **SONDAG SE GEBEURE**
- ❖ **KOOP-, VERKOOP-, TE RUIL-HOEKIE**
- ❖ **FOTO'S OM DIE NAWEEK MEE AF TE SLUIT**
- ❖ **LEKKERLAG GRAPPIE/VAALRIVIER JAARPROGRAM**

VAALRIVIER SAAMTREK TE SIONBERGH 21-23 FEBRUARIE 2020





Liewe Sawa vriende,

Nog 'n heerlike kamp is agter die rug en ek moet sê, dit was lekker rustig. Ons kampkommandante was uit die voorste gestoeltes en het uit hul pad gegaan om dit goed voorbereid aan te bied. Jacques, Sonja en André, julle mag maar weer 'n kamp in die nabye toekoms aanbied. Die weer was nou nie besonders mooi met ons nie, maar tussen die reënbuie deur kon ons darem boekevat, visvang en nog braai ook.

Ons het 'n skrywe van hoofkantoor ontvang waarin hulle met oorde wil onderhandel en beter pryse wil beding vir ons lede. Dit is 'n goeie idee, maar ons probleem is dat ons as Vaalrivier nie kan onderhandel met net 10 woonwaens op 'n naweek nie.

1. Ons eerste groot probleem is getalle. Sonder getalle kan ons nie beter pryse beding nie, maak nie saak hoe mooi briewe ons skryf aan oorde nie. Gebiedsaamtrekke is tans die enigste manier om dit te verander. Om dit reg te kry, moet ons voor die volgende AJV gesels en kampe bespreek waar ons saam as 'n groot groep kan kamp. Net ter inligting, 'n Vaaldriehoek gebiedskamp sluit die streke Noord-Vrystaat, Oranje, Overvaal, Riemland, Vaalrivier en Flamink [nou 'n satellietstreek] in.
2. Ons tweede probleem is dat voornemende kampeerders opdaag en oulike, ouerige menses met woonwaens sien wat graag kamp. Die voornemende kampeerders het meestal net tente of waentjies want woonwaens is baie duur en dan help die Regering ook nie juis om EB lisensies (wat 'n vereiste is om 'n woonwa te mag sleep) te verskaf nie.
3. Daar is ook 'n groot skeiding tussen die ouderdomsgroepe. Ons grootste aantal lede bestaan uit die ouderdomsgroep 60 tot 70 jaar jonk, wat beteken ons moet ons teikenmark verander. Om dit te kan doen moet ons jonger gesigte sien op ons kampfoto's, in ons tydskrifte en ook waar ons in die publiek verskyn deur middel van koerantberigte, sodat jonger mense hulle met ons kan vereenselwig.

Net ter inligting, ek het onder Punt 1 verwys na Flamink wat nou 'n satelliet is. Vir díe wat nie kennis dra wat ek hiermee bedoel nie, verduidelik ek soos volg: Tydens 'n vorige NUB-vergadering is besluit om streke met minder as 20 stemgeregtigdes af te gradeer na satellietstreke. Hierdie besluit is ook ten opsigte van Streek Flamink toegepas. Die gevolg van 'n satellietstreek is: Die satellietstreek funksioneer nog steeds asof dit 'n streek is. Die enigste verandering is dat net een afgevaardigde van die satellietstreek die Kongres sal bywoon in plaas van twee afgevaardigdes. Hierdie besluit is geneem om beter balans te verkry wanneer stemming moet plaasvind.

Ter stawing van my voorgenoemde stellings, verskaf ek die SAWA lede-ontleding vir Januarie 2020:

Ouderdom- ontleding van lede	<30 jaar	30 – 40 jaar	40 – 50 jaar	50 – 60 jaar	60 – 70 jaar	>70 jaar
Aantal lede	18	67	151	260	329	248

Tydperk in SAWA:

<2 jaar	3-5 jaar	5-10 jaar	10-15 jaar	15- 20 jaar	20- 25 jaar	25-30 jaar	>30 jaar
102	174	194	148	147	107	69	133

Bedankings (tydperk na aansluiting)

2 jaar	3 jaar	4 jaar	5 jaar	6 jaar	7 jaar	8-10 jaar	10–15 jaar	15-20 jaar	>20 jaar
<i>01 Julie 2000 – 30 Junie 2002</i>									
510	373	293	254	222	133	413	402	236	186
<i>Sedert 1 Julie 2002</i>									
9	6	8	6	5	6	6	330	14	12

Soos ons kan sien is dit nie 'n rooskleurige prentjie nie. Hoe veg ons om die behoud van ons klub vir ons nageslag as ons die nageslag nie eens betrokke kan kry by ons kampe nie? lewers sal ons as groep, nie net bestuur nie, moet hande vat en daadwerklik iets moet doen om ou lede terug by kampe te kry en om nuwe lede te werf. Dalk kan ons 'n oop gesprek voer by die volgende kamp. Een of meer van julle het moontlik 'n briljante idee wat ons kan ontgin.

Ons volgende kamp is by Bloekompoort en Richard en Christa Chapman gaan dit aanbied. Dit beloop om 'n lekker kuiernaweek te wees. Daar is nie veel om te doen nie maar dit gee ons mos nou juis die geleentheid om lekker te kuier, te rus of wat ookal vir julle sal werk.

Jer. 17:7 - Geseënd is die man wat op die Here vertrou en wie se vertrou in die Here is.

Groete tot ons mekaar by Bloekompoort sien.

Francois Pretorius





Sawa-vriende,

En weer eens was dit sulke tyd. Die Sawanante het opgetrek na die bergSionbergh.

Vrydag daar aangekom, het elkeen vir hom 'n gaatjie geskrop, sy tent opgesit en is daar hand uitgesteek na mekaar waar hulp nodig was.

Die res van die middag het almal maar net rustig gekuier tot dit tyd was vir boekevat.

Na boekevat het almal heerlike worsbroodjies gekry en lekker gesmul. Daarna het 'n paar dapperes die swembad aangedurf terwyl ander net lekker verder gekuier het.

Saterdagoggend na koffie was dit tyd vir boekevat, daarna looitjies uitneem en jou skuld by die oord betaal. Die res van die oggend het baie warm verloop en selfs 'n paar silwer seile oor tente het te voorskyn gekom. Dit was nie lank nie toe verander die weer drasties en begin dit te reën tot laatmiddag. Elkeen het maar skuiling teen die reën gesoek en het so groepies-groepies onder die tente sitplek geskrop.

Die gesamentlike braai het toe nie so gesamentlik uitgewerk as gevolg van die weersomstandighede nie alhoewel die reën opgeklaar het. Die manne het darem onder die lapa om die vuur gestaan en gesels terwyl die vleis ge-"sizzle" het. Daar was 'n oorfloed pap en sous waaraan almal hulle gehelp het. Lekker kos op 'n koelerige aand.

Sondagoggend na kerk en voorsitterstee het die "girls" wat daar was, weer gesorg vir lekker spoggerige broodjies en koffie. Die meeste het daarna begin oppak aangesien dit weer na groot reën gelyk het en nat tente is nou regtig nie 'n lekker storie nie.

Die eienaar van Sionbergh het groot verbeterings aangebring en die oord spog nou met 'n binnenshuise warmwater swembad. Ons kan dit dus nou oorweeg om in die winter daar te kamp.

Groete tot die volgende saamtrek by Bloekompoort.

Leon



FINANSIËLE VERSLAG

Vriende,

Ons het baie sonneblomme nodig om ons geldkas kleur en geur te gee sodat ons later vanjaar lekker verjaardagpartytjie kan hou. Hier is darem al 'n paar blommetjies in ons pot.

Tydens ons saamtrek die naweek van 21-23 Februarie 2020 te Sionbergh het ons 'n mooi bedraggie ingesamel. Hieronder volg 'n uiteensetting vir jul inligting:

Ons het twee looitjies gehad, naamlik 'n flits en 'n skoonheidsmiddels-"hamper". Die totale bedrag ontvang vir die looitjies was	R 740
Worsbroodjies is verkoop vir die totale bedrag van	R 580
Bywoningsplaatjies vir 10 woonwaens	R 200
Donasie van Henry Harts lief	R 50
TOTAAL	R1 570

Kom help ons om ons pot vol te kry. Ons hoop dat meer van ons lede by saamtrekke gaan begin inskakel in die toekoms, dit sal so lekker wees om julle almal weer te sien.

Groete aan almal tot ons weer saamkuier.

Elize



REDAKSIE

Al ons getroue Kekkelbek boekwurms,

Kan julle glo dis alweer ons tweede Kekkelbek vir 2020, die tyd vlieg verby!

Daar heers deesdae 'n aangename gees onder ons kampeerders by die saamtrekke: samesyn deur saam te kuier, saam te braai, saam te lag en pret te maak en Sondag na Voorsitterstee ietsie saam te eet en drink. Dit is regtig baie lekker. Julle moet dit almal kom probeer, ons daag julle uit om vir juisself te kom sien. Hier is 'n voorbeeld van hoe ons dit geniet.

Groete vir nou,

Louise



KAMPKASKEADES



Die kampkommandante besig om die “trimmings” vir die worsbroodjies reg te kry.



En so braai mens in die reën dat die wors nie nat word nie.



Die appel val nie ver van die boom nie, of hoe, Jacques?



Gustav en Jazelle gaan vleis braai, Gustav is besig om die vuur reg te kry.



Sonja is besig met haar naweeklikse danspassies.



En Jacques en André hou die passies van Sonja dop.

DIE VOORSKOOT



Ek weet nie of die moderne jong generasie eers weet wat 'n voorskoot is nie, maar ek gaan my bes probeer om aan julle die doel van 'n voorskoot te verduidelik.

Ons mammas en pappas was almal voorskootdraers. 'n Klein stukkie materiaal wat soveel doele gedien het. Ja, ek glo die oorspronklike doel was om die rokkie skoon en netjies te hou, maar ek wil werklik in diepte vandag na die voorskoot kyk.

Wanneer mamma of ouma vroegoggend opgestaan het, het sy gewas, aangetrek, tande geborsel, hare gekam en dan 'n mooi, netjiese, skoon voorskoot uit die kas gehaal. Dit was om haar klere skoon te hou deur die dag se harde werk sodat sy dit net vinnig kon afhaal en dan nog steeds net so netjies sou vertoon het.

Hoe meer ek oor die voorskoot dink, hoe meer besef ek dat die voorskoot in die ou dae dieselfde doel gedien het as wat die Here in ons dae dien. Die Here is daar om ons klere skoon en rein te hou sodat ons altyd gereed sal wees vir Sy koms. Maar kom ons kyk na nog 'n paar eienskappe van die voorskoot:

As daar 'n skaam of bang kind in die huis was, was die voorskoot die maklikste wegkruipplek. As 'n vreemdeling daar aangekom het, was dit so maklik om gou agter ma se voorskoot weg te kruip en dan het hy/sy so veilig en beskut gevoel. En ons vandag, ons word ook skaam en bang – en dan kan ons ook by die Here gaan skuil en net so veilig voel soos daardie kindjie agter die voorskoot.

As daar warm panne uit die oond gehaal moes word, het ouma sommer die voorskootpante bymekaar gevou en vinnig-vinnig was die panne op die afkoelrakke geplaas. Voel jy ook soms dat die hitte van die lewe nie met kaal hande aangepak kan word nie? Dan het jy die Here se bystand nodig om daardie hetige situasie te ontfont. En voor jy weet waar jy is, het Hy dit vir jou op 'n afkoelrak geplaas totdat jy die lewe weer met kaal hande kan aanpak.

As ouma eiers gaan uithaal het, was die eiers sommer in die voorskoot se sak gepak en as daar so 'n paar verdwaalde kuikentjies in die koue rondgedwaal het en sy bang was hulle sou verklum, was hulle in die voorskoot toegedraai en huis toe geneem waar sy hulle in 'n kartondosie naby die groot koolstoof geplaas het sodat hulle heerlijk veilig en warm sal wees. Net so draai die Here ons verdwaalde en verklumde siele toe en plaas Hy ons op 'n warm en veilige plek tot die koue verby is en ons sterk genoeg is om weer na onself om te sien.

Wanneer ouma in die deur gestaan het en sy het hoog met die voorskoot gewaai, dan het oupa en die werkers dit daar ver op die lande gesien en dan

het hulle geweet ouma het 'n heerlike maaltyd voorberei en sy waai dat hulle kan weet die kos is op die tafel. Is die nie wonderlik dat die Here ook weet wanneer ons hard gewerk het en ons geestelik honger is, dan waai Hy vir ons om te kom eet. Elke môre en elke aand berei Hy vir ons geestelike voedsel voor in die vorm van ons oordenking en gebed maar Sondae word daar vir al Sy honger kinders 'n feesmaal in Sy Huis voorberei.

Een van die oulikste eienskappe van die voorskoot is as ouma sien daar is stof in die pad, dan weet sy daar is onverwagse gaste op pad en vinnig word die voorskoot afgehaal en woeps waps is al die meubels gou afgestof en staan ouma haar gaste en inwag met 'n skoon rokkie aan en is die stowwerige voorskoot nêrens te sien nie. As ons vuil en stowwerig voorkom dan neem die Here ons en Hy poets ons skitterblink en dan kan ons die wêreld met 'n geruste gemoed ingaan, netjies en slagereed.

Ouma se voorskoot was ook dikwels gebruik as ons by haar gaan sit het en ons harte uitgehuil het oor 'n verlore liefde of oor ons groot teleurstelling of die pynlike seer wat ons ervaar. Dan het ouma daardie voorskoot ingespan en die trane is afgedroog en die neusie is afgevee en jy het geweet ouma gaan nou die saak beveg. Sjoë, en hoe heerlik om ons seer en pyn by Jesus te gaan uitsnik en dan op te staan en weg te loop in die wete dat Hy nou beheer oorgeneem het.

Soms as jy onverwags by ouma opgedaag het, het jy haar op haar knieë gekry waar sy besig was om haar hart voor haar Skepper oop te maak. Die voorskootpante was voor die oë gedruk om die trane te absorbeer. As jy vandag aan die voorskoot dink, dan besef jy hoeveel kieme daar heel moontlik in daardie voorskoot vasgewerk was.

Die Here het ook vuil en vol kieme geword op Golgota.. maar dit was ook oorskadu deur die groot en wonderlike liefde wat Hy daar openbaar het. Ons Vader is ons voorskoot in hierdie deurmekaar wêreld.

(Hierdie boodskap is deur Georgie geskryf en deur Petro van Niekerk aan ons voorsien – baie dankie Petro)





RESEP: JAPTRAP ETE

(Resep is vir ongeveer 4 persone)

Bestanddele:

3 groot aartappels

1 ui, fyngekap

1 groenrissie, fyngekap (opsioneel)

Olie vir braai

500g maalvleis

1 tamatie

Sout en peper na smaak

2 koppies gerasperde kaas

1 pakkie Potato Bake (geur van jou keuse)

Metode:

- Kook aartappels tot sag in water met bietjie sout, haal vel af, sny in skywe en pak onder in bakskottel.
- Braai olie, uie, groenrissie vir ongeveer 15 minute en voeg dan maalvleis by.
- Voeg tamatie, geurmiddels na smaak, sout en peper by maalvleismengsel en prut tot gaar.
- Berei Potato Bake soos op pakkie aangedui en gooi bo-oor aartappels.
- Sprinkel bietjie gerasperde kaas oor aartappelmengsel.
- Skep maalvleismengsel oor aartappels.
- Bak vir 30 min. in oond op 180°C.
- Sprinkel res van gerasperde kaas bo-oor en bak totdat kaas gesmelt en goudbruin is.

(As jy nie Potato Bake het nie, kan jy 'n kaassous maak van 15ml margarine, 250ml melk, 15ml koekmeel, 250ml gerasperde kaas)

VERJAARDAE



Eileen Bezuidenhout
Henry Hartsliet
Neels Kriel
Zandry van Rooyen
Dries van der Linde

02 Maart
14 Maart
15 Maart
15 Maart
29 Maart



Hierdie spesiale verjaardagwens is vir **André van Niekerk** wat op **28 Maart** 70 jaar jonk gaan wees. Van almal by Streek Vaalrivier ekstra spesiale wense aan jou en Petro, mag julle nog baie jare goeie gesondheid geniet en vir mekaar gespaar bly met baie liefde wat julle altyd sal omring. Geniet die dag. Ons dink aan julle.

HUWELIKSHERDENKINGS



Marcel & Carine van In 05 Maart
Rian & Chantell van Zyl 17 Maart
Jacques & Lizelle van Zyl 28 Maart

GELUKWENSE

*En kyk net watter fantastiese nuus het ons gekry!!
Ons het 'n nuwe oupa en ouma in wording!! Baie geluk
met die groot nuus Richard en Christa, ons vertrou
dat ons oor 20 weke 'n foto van julle en jul kleinseun
kan plaas.*



NOG GOEIE NUUS!

Francois en Dot het ook
weer oupa en ouma geword
van 'n seuntjie. Baie geluk
aan julle.
Mag hy vir julle baie
vreugde bring.

Ook baie geluk aan Bertus
en Monique Venter,
die trotse ouers.



BETERSKAPWENSE



Eugène Botha – ons vertrou dit gaan elke dag net beter.

PJ Johnson se ma het 'n ernstige beroerte gehad. Baie sterkte vir julle.





DIE SENIORS SE HOEKIE



Gister was ek slim,
 toe wou ek die hele
 wêreld verander....
 vandag is ek wys
 nou verander ek
 eerder myself.



*Moenie
 jou lewe tel
 in jare nie,
 maar in die
 spesiale
 oomblikke
 van elke
 dag*



(Die bostaande gedig is geleen uit 'n digbundel - "Terwyl ek Kan" - deur Rien Joubert)

DIE VISSERMANNE IS BESIG BY SIONBERGH



Henry, is dit hoe mens die visse lok?



Hier word planne gemaak.



Francois, is dit 'n nuwe manier van visvang?



'n Paar onbeïndrukte toeskouers



Kan 'n man dan nie grote(r) visse vang nie?



SKINDERBEKKIE SE VERHAAL VAN NAASTELIEFDE

Liewe ooms en tannies,

Dit was so lekker toe ek hoor ons gaan weer kamp. Ek begin nou al van die mense ken en dis so lekker om te sien wat almal doen. Ek is seker ek sal nog baie goeie dinge leer by al die kampeerders.

Ek het hierdie keer 'n les oor naasteliefde geleer en wil julle graag daarvan vertel. Dalk kan julle dit ook in die toekoms toepas.

Tannie Petro en oom André het Saterdagoggend dorp toe gegaan. Toe hulle terugkom, het tannie Petro na tannie Wilma toe gegaan en vir tannie Wilma 'n Miladys sakkie gegee. Tannie Wilma was baie verbaas en het bekommerd gewonder wat op aarde in die sakkie kan wees. Miladys verkoop klere, onderklere, ens. en hoe sal tannie Petro nou weet watter grootte vir tannie Wilma sal pas.

Maar tannie Wilma was darem lekker nuuskierig om te sien wat binne-in die sakkie was en maak dit toe oop. En kan julle glo wat was in die sakkie?



Tannie Wilma het, voordat tannie Petro-hulle dorp toe gegaan het, gesê dat sy so lus is vir springmielies om in die mikrogolf te skiet, maar nou het sy nie saamgebring nie. Tannie Petro het dit gehoor en daarom het sy, toe sy in die dorp was, die moeite gedoen om vir tannie Wilma te gaan springmielies koop.

Hierdie moet vir ons almal 'n les wees, veral vir die ooms. Moenie 'n dowe oor gooi as die tannies sê hulle is lus vir iets of hulle wil so graag dit of dat hê nie. Doen moeite om dit vir hulle te kry, hulle sal so baie dankbaar wees en die ooms kan dalk ook baat vind daarby.


Groete tot volgende keer, ek sal weer kom kuier. **Skinderbekkie**

O, amper vergeet ek, my mamma sê ons gaan eendag vir ons so 'n woonwa koop. Maar ek moet eers nog baie stories skryf.



VIR DIE JONGSPAN

Skool is klaar vir die dag. Kyk of jy jou pad huis toe kan vind.



Is julle by die huis, het julle die pad gekry of moes Mamma help? Mooi!!!
Welgedaan!!

SONDAG SE GEBEURE



Die erediens. Die prediker se boodskap was op almal van toepassing.



Leon het as Voorsitter waargeneem en Henry en André gelukkigwens met hul komende verjaardae.



Jacques en Lizelle se huweliksherdenking is in Maart. Hulle lyk nog heel in hul skik met mekaar.



Ons kampkommandante vir die naweek. Baie dankie julle, ons het dit geniet.



Lizelle het die gesogte skoonheidsmiddels- "hamper" gewen. Geniet dit julle twee "girls".



En toe was dit tyd vir broodjies en tee!!
Lekkerrr!!



Sawanante, julle kry van nou af die geleentheid om goedere wat julle te koop wil aanbied; wil ruil vir iets anders of 'n item wat jy graag wil aanskaf en wil hoor of iemand dalk so iets het waarvan hy/sy ontslae wil raak, in die Kekkelbek te adverteer.

Stuur asseblief jul besonderhede en 'n duidelike foto en beskrywing van die item wat jy wil aankoop, ruil of verkoop, aan die Kekkelbek per e-pos. Dit sal dan in die volgende uitgawe geplaas word. Hier volg ons eerste advertensie:

Treiler met tent te koop - R25 000
Slegs een keer gebruik

Kontak Willem Manders
082-882 7060

FOTO'S OM N HEERLIKE NAWEEK MEE AF TE SLOW





LEKKER LAG GRAPPIE

Ouma se Broccoli

Die 4-jarige seuntjie het by sy Ouma gaan kuier. Ouma het dit goedgedink om hom 'n bietjie meer te leer van groentes en spesifiek die wat sy ma nooit voorberei nie.

Die spesifieke dag is BROCCOLI aan die beurt en Ouma versin die oulikste storie oor die boompie wat hy gaan proe.

Die seuntjie begin ewe entoesiasies aan die eerste broccoli boompie proe, maar Ouma sien hy kou al stadiger met 'n veraf uitdrukking in sy oë. Ouma verdwyn gou-gou in die spens in en na 'n rukkie hoor sy hom roep: "Ouma, kom kyk gou hier!" Toe Ouma by hom terugkom, wys hy na sy bord waarop hy die broccoli boompie in 'n hoop rys staangemaak het, mooi vasgedruk in die middel van die rys. "Kyk Ouma, hierdie is die Paradys en daardie is die boom waarvan God gesê het ons mag nie eet nie!"



VAALRIVIER 2020 JAARPROGRAM

Ons saamtrekke vir die res van 2020 is soos volg:

DATUM	OORD	KAMPKOMMANDANTE
20-22 Maart	Bloekompoort, Vereeniging	Richard & Christa Chapman
01-03 Mei	Tava Lingwe	Gebied Saamtrek
29-31 Mei	Bush Inn, Springs	Henry H & Francois P
03-05 Julie	Eastco, Magalies	Anton & Joey Delport
07-10 Augustus	Malonjeni	AJV + 40e verjaardagvieringe
25-27 September	Aasvoëlkrans	Kobus & Eileen Bezuidenhout
30 Okt – 01 Nov	Geheime Kamp	Marcel & Carine van In
27-29 November	Casa Cara, Parys	Kerskamp